



SURUHANJAYA PILIHAN RAYA MALAYSIA

KENYATAAN MEDIA

BIL.76/2019

SESI LIBAT URUS SURUHANJAYA PILIHAN RAYA (SPR) BIPARTISAN BERHUBUNG PELAKSANAAN UMUR PENGUNDI 18 TAHUN DAN PENDAFTARAN PEMILIH SECARA AUTOMATIK

1. SPR sedang dalam persiapan untuk melaksanakan pindaan Perlembagaan Persekutuan berhubung umur kelayakan pengundi 18 tahun dan pendaftaran pemilih secara automatik. Salah satu dari persiapan tersebut adalah **mengadakan sesi libat urus bipartisan bersama parti-parti politik berhubung Pelaksanaan Umur Pengundi 18 Tahun dan Pendaftaran Pemilih Secara Automatik.** Ia telah diadakan pada **3 Oktober 2019** dan seramai 20 orang wakil daripada parti-parti Kerajaan dan pembangkang telah hadir.
2. Semasa sesi tersebut, SPR telah membentangkan **cadangan pelaksanaan umur pengundi 18 tahun dan pendaftaran pemilih secara automatik, pelantikan Penolong Pendaftar Pemilih (Parti Politik)** untuk membantu SPR dalam urusan pendaftaran pemilih, **Program Pendidikan Pengundi** dan kemudahan mengundi kepada pemilih di luar kawasan.
3. Bagi maksud pelaksanaan umur pengundi 18 tahun dan pendaftaran pemilih secara automatik, **satu Jawatankuasa Task Force SPR** dan **Jabatan Pendaftaran Negara (JPN)** telah ditubuhkan bagi urusan penyelarasan maklumat warganegara

dan perkara-perkara lain yang berkaitan. Di samping itu, salah satu program kerjasama SPR dan JPN yang telah dirancang adalah mengadakan kempen secara besar-besaran bagi menggalakkan warganegara untuk mengemaskini alamat mastautin terkini di JPN.

4. Umur pengundi 18 tahun dan pendaftaran pemilih secara automatik dijadualkan akan dikuat kuasa untuk dilaksanakan selewat-lewatnya pada 1 Julai 2021. Namun begitu, SPR akan berusaha untuk melaksanakannya secepat mungkin.

5. Dalam tempoh peralihan sebelum ianya dikuat kuasakan, SPR memaklumkan **cadangan untuk melantik Penolong Pendaftar Pemilih (PPP) dalam kalangan ahli parti politik.** Bagi tujuan ini, parti-parti politik boleh mengemukakan cadangan pelantikan ini kepada Ibu Pejabat SPR dan mana-mana Pejabat Pilihan Raya Negeri di seluruh negara mulai sekarang.

6. SPR juga telah memaklumkan tentang **pelaksanaan Program Pendidikan Pengundi dan Program APR Associate Trainer (AAT)** yang bertujuan untuk memberikan kesedaran dan kefahaman tentang proses demokrasi dan pilihan raya di Malaysia terutamanya kepada golongan belia dan pelajar sekolah. Bagi tujuan pelaksanaan program-program ini, SPR telah membangunkan modul khusus mengikut kumpulan sasaran iaitu modul pendidikan pengundi untuk belia lepasan sekolah dan modul pendidikan sivik untuk pelajar sekolah menengah. Sekiranya ada parti politik ingin mengetahui tentang perkara tersebut, SPR bersedia untuk memaklumkan kandungan terperinci modul tersebut.

7. SPR turut memaklumkan cadangan memberikan kemudahan mengundi secara pos bagi pemilih luar kawasan (PLK) seperti:

- a. **Berada di luar negeri bahagian pendaftarannya pada Hari Mengundi;**
- b. **Bertugas dalam sektor kesihatan dan keselamatan serta bertugas pada Hari Mengundi; dan**
- c. **Warganegara Malaysia yang berada di luar negara termasuk Brunei, Singapura, Selatan Thai dan Kalimantan Indonesia.**

8. Untuk makluman, bagi pemilihan wakil Dewan Rakyat, tarikh pelaksanaan kelayakan calon umur 18 tahun telah mula dikuat kuasa pada 11 September 2019 yang lalu.

9. Untuk pemilihan wakil Dewan Undangan Negeri (DUN) pula, ianya masih belum dikuat kuasa lagi kerana memerlukan pindaan kepada Undang-Undang Tubuh Kerajaan Negeri atau Perlembagaan Negeri diluluskan terlebih dahulu. Pada dasarnya, SPR menyarankan agar **pindaan ini dibuat semasa persidangan DUN yang dijangka dalam bulan November 2019 atau selewat-lewatnya bulan Mac 2020.**

10. Kesemua pihak ambil maklum akan pindaan ini yang berkuat kuasa di peringkat Dewan Rakyat dan berharap ianya juga dapat dilaksanakan dengan segera di peringkat DUN.

11. Hasil daripada perbincangan tersebut, SPR telah **mengambil maklum ke atas semua cadangan dan idea yang diajukan oleh wakil-wakil parti yang hadir** dan membuat pertimbangan yang sewajarnya sebelum ianya dilaksanakan. SPR juga akan terus mengadakan sesi libat urus dengan parti politik dan pelbagai pihak dari masa ke semasa selain memaklumkan status pelaksanaan terkini. SPR turut ingin merakamkan ucapan terima kasih kepada wakil-wakil parti politik yang hadir atas sumbangan idea dan cadangan penambahbaikan yang diberikan.

Sekian, terima kasih.

DATUK AZHAR AZIZAN HARUN

Pengerusi

Suruhanjaya Pilihan Raya (SPR) Malaysia

Tarikh: 10 Oktober 2019 / 11 Safar 1441H